

蘇魏公文集

萬靈署

蘇魏公文集卷三十五

宋太子太保右僕射同中書門下平章事司空魏國公蘇頌撰

逢年舜明

高孫萬靈錫經重祿

外制

晉爵耀庭

皇叔彰德軍節度使左僕射同中書門下平章事宗樸故育母樂安郡太君
吳氏追封永嘉郡太夫人

勅朕惟祖宗敦睦之義定爵祿名數之差雖位為公侯猶不以親私而干寵恩有
顧復乃當用子貴而議封禮亦為宜朕安敢恡具官某故某母某氏謹幽閒之治
有柔絮之風奉事王宮夙彰於賢範挺生懿戚方嗣於慶宗向緣裡類之恩載形
追命之請稽諸令甲抑有舊章以副筭象服之儀為厚寧華阡之貴尚茲冥漠歆
是寵榮可

皇兄故金紫光祿大夫右武衛大將軍世符可贈鎮海軍節度觀察留後北
海郡公

勅夫睦親之恩生則有班爵之等恤後之義歿則有贈祿之榮特舉彝章用寄哀

戚具官某天枝擢秀宗邸稱賢浸陶信厚之風克謹驕盈之戒早膺時寵薦服衛環假節兵防秩視通侯之貴奉朝禁籍日勤拱著之趨詎謂盛年奄茲徂謝九州近鎮兩使隆階用加飾壞之儀仍胙封公之爵營魂未泯漏澤是歆可

皇伯故右龍武大將軍克友贈華州觀察使華陰侯

勅班爵之榮所以表敦睦之義贈卹之典所以厚始終之誠眷言宗邸之賢久預朝闈之列奄茲淪逝宜有追褒以爾具官某挺生王家早聞邦教不以貴寵而易其守故能謙慎而保厥家藉在衛環峻官儀而益重任兼團結持使節以參華何圖盛年遽邁凶閼越以廉車之秩胙之侯社之田寄我悲懷慰爾冥路哀榮之禮茲莫重焉魂而有知歆此殊渥可

皇弟右千牛衛將軍仲涂可贈右屯衛大將軍

勅國家之於宗族惇睦之恩至矣生則有寵貴之榮歿則加追賁之典惟其禮秩皆不與外庭比所以厚親戚而屬人倫也以爾具官某溫良之性得於天資謙慎之儀成於邦教處貴而能循禮法奉朝而匪懈夙宵假寵衛環方參聯於表著棄捐館舍遽淹質於泉塗宜推褒卹之文且示哀榮之渥八屯峻列大將通班刻以密章告於循路顧明靈之未泯諒滲澤之可承可

故楚國大長公主可追封秦國大長公主謚孝莊

勅外館懿親生而視王侯之貴曲臺故事歿則推贈賻之恩言念平陽之嫺素鍾長信之愛方見尊寵遽茲淪亡宜加卹典之優用寄悲懷之切以爾某氏麗禮華之質分星婺之輝生於宸闈蔚有賢範降嬪戚里蚤開府屬之榮胙土名區載徹粉田之賜朕以仁祖之息諸姑之倫浴崇秩儀固越樊等不幸罹於美疢奄然奪於盛年追惟淑靈當有褒表夫節惠之義實重於二名進封之科莫先於成國以顯服而旌遺德以刻章而告幽途情禮並隆明誠斯饗可

故永嘉郡夫人趙氏可追封蕭國夫人

勅彤彤懿範生則有脂田之封漏澤深仁歿則有綬章之飾追懷遺美特示榮褒以爾故某氏體質柔閑性資循裕夙謹女圖之鑒內參宮尚之聯而淑質靡留徂年早謝嘉乃柔風之茂宜推象服之華國壤疏恩塋窆增賁想芳靈之未泯宜寵典之斯承可

皇太后姑故右侍禁李守慶妻高氏可特封延安郡夫人

勅朕丕承先烈欽奉母儀矧彼諸姑實冠親姻之黨特加異數式隆悃愛之風皇太后姑故具官某妻某氏備有德言能循法度早歸嬪於華族方尊寵於外家以

推恩章抑惟舊典爰進封於善郡且加號於小君所以上慰慈顏兼褒懿範膺茲嘉命克保殊榮可

皇太后妹右班殿直聶宣仲妻高氏封平恩郡君

勅外家之愛禮有惇隆從母之倫恩宜顯厚加崇命數豈限等獎皇太后妹具官某妻某氏毓質粹和秉心柔令結衿褊於夫室夙擅華腴侈車服於親姻尚稽表異躋進號封之美仍開郡壤之榮祇服褒章永綏福祚可

皇太后妹皇姪故鄆州觀察使令典妻高氏封長樂郡君

勅朕惟長樂之姊弟相在藩侯之室家戚屬並優禮意宜厚稽諸令甲當有寵褒皇太后妹具官某妻某氏系出舊勲望高外族有閑和之範來嬪宗嫔有介靜之誠能保婦操爰推惇叙之澤超進號封之榮善郡美名用旌賢懿隆恩異數當克欽承可

皇太后姊皇伯文州防禦使宗達妻高氏封咸寧郡夫人

勅朕惇睦九族尊事兩宮惟國藩世母之賢本長樂天倫之愛宜加顯命庸慰親慈皇太后姊具官某妻故某氏蘊柔德之和襲舊勲之慶夙推婦順歸我宗英雖懿質之早零想芳猷而未泯載稽典式寵進號封追榮象服之崇用賁壙宵之貴

淑靈不昧厚渥斯承可

太皇太后姪孫曹詮女皇叔克頤妻曹氏封同安郡君

勅長信族屬宗室世姍案諸典章所宜寵異矧夙承於愛育宜特茂於恩徽以爾具官某妻某氏資稟靜專幼聞禮教出於椒禁歸我藩侯亦既宜其室家能不失於婦道因疏郡壤命徹號封祇欽獎綽之榮益念薦繁之助可

皇兄右千牛衛將軍叔皮妻曹氏可封永嘉郡君

勅具官某妻某氏宗室諸婦禮有賜封長信外門恩先近屬厚親廣愛在義則然以爾承地胄之華富柔明之美早被慈闈之訓育能勤女史之箴規擊佩有行既歸於邦族粉田均澤宜茂於寵章進開郡壤之榮用顯戚藩之盛膺茲麗渥保爾令名可

祁國長公主乳母侯氏可封壽光縣君

勅某氏朕以長公主先帝之息我之同氣築館於外筮日有行恩禮所加固宜優異惟其阿保之列夙勤燥濕之安寵以邑封蓋循邦制往承渥渙母替謹柔可

左羽林大將軍令圖故母同安郡君王氏可追封南康郡夫人

勅向者禮成郊報恩浹幽明惟班著之聯戚被顯親之澤矧宗藩之秀方深念母

之懷加厚恤章抑惟舊典具官某妻某氏柔儀有度順德不愆嬪我懿親夙彰賢範雖數徂年之謝尚嘉有子之良緣茲慶條進以封號俾追榮於象服姑用慰於寒泉冥漠有知寵靈是享可

尚書吏部侍郎叅知政事韓絳封贈三代

曾祖處均贈金紫光祿大夫太師中書令可持贈兼尚書令餘如故

勅任人共政國體之所先揚名顯親人臣之尤貴屬我登賢之始爰推率祖之恩峻以職儀慰以誠孝以爾某生稟純德世服文儒居則仁義充其中不以紛華悅於外養浩然之氣自樂於鄉閭遜貽厥之謀遠開於似續作我良輔時其裔孫因進擢於台司俾再加於冊命以中臺總領之秩告三世享嘗之庭臣子之榮可謂至矣所宜歆識益祚爾家可

曾祖母追封秦國夫人李氏可追封秦國太夫人

勅貳公寅化方登用於柄臣追孝奉先宜褒榮於世配薦推恩數用貴家庭以爾具官某曾祖母某氏挺柔順之姿躬德言之範夙成壺則茂振嬪風雖久閱於音容尚克流於惠問曾孫之慶大政是毗副筭六珈已屢頒於象服沃野千里宜載徹於粉田畀爾寵章式旌遺懿可

祖保樞贈太師中書令尚書令可追封燕國公餘如故

勅今夫與我共守祖宗之業而裁成天下之化者非二三輔弼之臣歟故於進拜之初優其禮命而追榮及於祖考所以欲其移孝而為忠也以爾具官某祖某天質渾厚器識閑通有長者之風而自晦其德有君子之澤而垂裕於後克生賢嗣為時大臣今而令孫復嗣厥位存慰機庭之貴進毗台宰之司弈世三公宗祏已崇於典冊封爵五等燕邦載徽於土田告茲幽局識茲茂渥可

祖母追封魯國夫人周氏可追封魯國太夫人

勅登四近之臣贊萬微之務恩隆體貌義切股肱諒非積慶之有源曷副疇咨而入用爰推異數用表先芬以爾具官某祖母某氏稟訓姆師能勤婦道約珩璜而制禮動中音儀絜蘋藻以承家克修宗事蘊是懿德鍾於後昆翟氏之儀已加於象服脂澤之邑載錫於名區不易故封式昭遺美淑靈永泯厚渥斯永可

祖母追封魯國夫人郭氏可追封魯國太夫人

勅登用二府所以圖國家之治追寵三世所以教臣子之忠我有碩臣方毗大政封崇先代抑有彝章以爾具官某祖母某氏性蘊淑和道遵慈儉出於華胄歸彼令人曾微出梱之言居有擇鄰之訓積是餘慶克昌後昆維子洎孫繼顯榮於台

魚委人文集 卷三
路徹田胙國屢加寵於國封曲阜舊邦小君美號再加錫命庸慰孝思維精魄之
未亡尚寵靈之是識可

父億贈開府儀同三司太師中書令尚書令上柱國可追封周國公餘如故
勅流之長者由夫源深枝之茂者自乎本固眷我碩輔出於名門若時奮庸克大
前烈將慰述先之念載疏錫壤之恩以爾具官某父某在仁祖世以嘉謨碩畫進
貳機衡忠規具載於廟彝義訓乃貽於子舍朕以絳體質方重論議純深願為良
臣善守先代擢於世職可謂象賢當其拜宸之初必動履霜之感相爾舊國時維
成周再加九命之崇用顯三公之世告於宗祏尚或歆承可

母追封普安郡太夫人蒲氏可追封崇國太夫人

勅陟台衡而預政方擢幹臣飾泉壤以疏封蓋旌懿範屬此疇庸之始爰推錫類
之恩以爾具官某母某氏挺生慶門作配君子有四德之美成二族之和室家之
宜既克成於婦道日月其逝愴弗逮於朝榮宜因嗣子之登台載徹脂田而錫命
小君之號啟國於崇并示寵靈賁於廟室可

母追封平陽郡太夫人王氏可追封榮國太夫人

勅禮傳所稱女子有三從之義冊命之錫封爵有四等之殊緬維芳風賁兼具美

以爾具官某母某氏丞相太尉之子中令周公之妻出自慶門歸彼時傑生見榮
盛歿於慶靈有子而以載世預政屬咨俞之拜後念顧復之有懷俾擇名區用胙
乃國二族顯赫無若爾家前史所謂婦人之貴其謂是乎魂而有知當歆茂渥可
新除右議大夫叅知政事王安石封贈三代

曾祖

勅禮稱天子之大夫祭及三世又曰父為士子為大夫亦祭以大夫蓋從生者之
祿由古然也今夫執政之臣同體元首顧其名數豈特大夫之比則追賁祖禰禮
宜有加具官某曾祖某江右之秀德器素高義訓之傳世風自遠榮名不顯於當
世慶善乃流於後昆惟其令孫作我良輔方屬登臺之始用推本祖之恩以儲宮
保輔之榮為宗祐追崇之美精爽不昧寵靈是歆可

曾祖母

勅國家登用輔臣躡加命數叅六卿於朝路預我政幾享三室於家庭逮其世配
均推滲澤庸達孝思具官某曾祖母某氏明智自將慈嚴合度宜其家室蹈嬪則
而不踰貽厥孫謀贊台司而伊始命追榮於大郡且加號於副笄既啟有家之榮
采光積善之報淑靈如在厚渥其承可

祖

勅夫積之厚者其流光位之崇者其禮異我得棟幹擢在柄司立於朝廷則有協心同體之義念其祖考豈無進封飾壤之榮稽若故常具存彝典具官某祖某服道秉誼含章葆和寘彼周行未登貴仕之列施於孫子蓋有陰德之馮用裕厥宗再世而大王室其父祖構是承惟東儲二品之班視前代三孤之秩錫此明命賁於私庭魂其鑒茲采胙爾後可

祖母

勅國家待執政之臣禮亦重矣既尊寵其人又追賁其祖妣所以嘉似續之慶因以勸夫在位重其本而厚其報也具官某祖母某氏挺賢明之識兼婉淑之儀善行積於厥家慶靈久而後大叅予近弼之貴時乃令孫之賢諗是忠規本乎門法彤管有煒既彰家道之成象服是宜乃正封君之號冀爾冥漠嘉茲寵靈可

父

勅前史稱臧孫達之有後又美鄭公業為不亡蓋繼之者明則美濟厥世未若父為儒者名稱於一時子為輔臣寵延於三世非其善訓夫豈享茲具官某父某素履清修周才敏邁策名從政進乃望郎之華佐郡典州諒然良吏之稱位弗充量

福固有基若時嗣子之賢登我台司之貳逮親之感方對於鼎茵追往之恩用加於冕紱以儲師之峻秩為禰室之褒榮魂而有知饗此殊私可

母

勅朝廷莫如爵故二府有易數之加寢廟莫如親故三室有同牢之享矧惟妣德之懿豈吝卹章之褒具官某母某氏言憲典常德馴慈順歸儷良士實生令人諷召南之詩則蘋蘩之薦不失服季姜之戒則經幅之喻以明時其邦傑之奮庸抑自家庭之垂裕叅聞國論既聯三事之崇追述母儀用錫六珈之副茲所以彰我闔澤之漏慰彼寒泉之思緬茲淑淑靈享是嘉命可

母

勅仕之貴者莫貴於作弼孝之大者莫大於顯親登賢既預於政司報德宜先於禰室推存念往我何吝焉具官某母某氏備有言容能循法度從夫而仕則內助之德修有子而賢則陰德之施顯屬茲圖任之始固切慈顏之懷用加號於小君且進封於大郡侑爾宗祏既開家采之榮利於嗣人無忝公台之寄可

觀文殿學士兵部尚書知青州歐陽修父

勅郊之祭也上以恭天地之報下以揚祖宗之休屬告成於盛儀遂推行於惠澤

眷吾台衡之舊適宣方面之勞懷其先芬既極顯揚之美胙以成國式章尊寵之名具官某父某毓德士鄉策名聖世蘊濟時之用位下而不得施憑積善之祥澤流而逮乎遠果有賢嗣大其門閥袞衣密章已峻九儀之貴國封公爵俾增千乘之榮非徒嘉爾教忠之能抑亦成吾廣孝之義精爽不昧優渥是承可

母鄭氏

勅精禋類帝所以訓天下之恭揚名顯親所以教人臣之孝曰予邦彥有懷母慈宜推慶恩用光賢範具官某母某氏生有淑質歸於德門詠蘋蘩之詩則婦道克順明經幅之喻則母儀備存貽此哲人作我良輔生雖不及鼎茵之享歿而屢有湯沐之加承此神釐進以大國夫封爵錫命誠未足慰孝子永慕之情而旌善表賢抑可以成公朝獎勸之義惟爾冥漠歆茲靈寵可

妻薛氏

勅夫祭祀之澤廣矣既已推於羣臣而又逮其家室所以明神惠而厚人倫也矧吾舊德之配夙聞主饋之賢慶典所覃寵章宜厚具官某妻某氏出高明之胄有柔婉之風作嬪良人克相宗事絜蘋蘩以承祭匪懈溫恭服副笄而預朝薦膺榮渥屬邁邦釐之治載陪郡壤之封且擇美稱益光內治往對褒華之命勤宣輔佐

之功可

翰林學士右諫議大夫司馬光父贈司空

勅朕宅位之再歲考卜郊之三年天其相予既克成於熙事福不專享是用惠於庶工且追賁於先芬俾顯揚於世美具官某父某德器闕茂風規峻凝徊翔臺閣之華宣布藩朝之政經綸之業猶未究其施為燕翼之謀蓋有貽於似續時其子舍服在禁林方見尊寵於朝廷固已崇大其門構姑緣裡燎之慶載加襍服之榮秩以上公位乎空土豈特章名臣之餘烈抑以慰嗣子之孝思冥漠有知寵章其享可

龍圖閣直學士工部侍郎張栻父贈司徒

勅朕因郊以承天之序念親以及人之先爰推慶恩式叙在位矧予名德之舊夙紹素風之傳卹典所加褒章宜厚具官某父某躬服道誼內懷器能策名清時仕不充於雅望垂裕後嗣職久列於近班蓋源之深者流自長而位之隆者禮亦異姑緣肇祀之渥用顯教忠之能秩以上公總乎五教尚歆告第之寵益胙有家之蕃可

侍衛親軍馬軍都虞候楊遂父

勅郊邱之祀所以訓天下之恭贈樾之思所以達諸臣之孝甫成熙事爰覃慶章且先追往之恩用慰因心之感具官某父某吉履有素鄉評所推善行在躬而未彰慶靈至子而乃復勤宣職業良嘉父教之忠欲報勅勞俾進尹環之列尚歆殊渥永裕後昆可

楊遂母

勅郊祭之推恩也上以均天地之況下以揚祖宗之休福釐紛然中外時若眷言拱著之列方逮承顏之榮宜厚寵章用昭報德具官某母某氏以柔賢之美既宜夫家以慶善之憑獲從子貴俾躋封於大郡且均寵於北堂欽承優渥之恩益嚮壽康之福可

楊遂妻

勅朕初郊泰元大賚天下思與士類均承福釐眷言拱衛之聯並開爵邑惟其室家之慶宜懋寵章具官某妻某氏備有言容能循法度從夫而顯主饋是承屬大祀之休成均湛恩而下逮進榮大郡增美華宗益宣內助之勤用稱重封之渥可
樞密使劍南西川節度使守司空兼侍中文彥博奏汾州介休縣草澤史劉妻文氏追封永嘉縣太君

勅某氏鍾慶德門歸墳吉士屬但年之早謝閔昆裔之靡承眷我台宰之賢方有
諸姑之愴願移恩施正以號封俾開爵邑之榮慰彼幽泉之路顧惟精魄尚識寵
光可

